

दिनांक 14.03.2024

समय: 18.45 बजे

आकाशवाणी जयपुर-अजमेर

प्रादेशिक समाचार।

- एक राष्ट्र-एक चुनाव रा बारा मांय बणायी ज्यी कोविंद समिति राष्ट्रपति ने रपट सूंपी-दो दौर मांय चुणाव करावण री सिफारिश कीनी।
- मुख्यमंत्री भजनलाल शर्मा पेपर लीक मामला री जांच सारू बणायी ज्यी एसआईटी रा अहलकारां सागे आज मीटिंग कीनी।
- केन्द्र सरकार राज्य मांय सड़कां रा विकास सारू 9 सौ 72 करोड़ रुपया ऊं बत्ती रकम मंजूर कीनी।
- भारतीय खाद्य निगम प्रदेश मांय सरकारी मोल माथे गेहूँ री खरीदी सरू कीनी।

000

पूरा देश मांय एके सागे चुणाव करावण रा बारा मांय बणायी ज्यी कोविंद समिति आज नई दिल्ली मांय राष्ट्रपति द्रौपदी मुर्मू ने रपट सूंप दीनी। पैली वाळा राष्ट्रपति रामनाथ कोविंद री सदरत वाळी आ समिति केन्द्रीय गृह मंत्री अमित शाह, विधि अर न्याय मंत्री अर्जुन राम मेघवाल, 15वां वित्त आयोग रा पैली वाळा अध्यक्ष एन. के. सिंह अर दूजा मान्योड़ा लोगां री मौजूदगी मांय राष्ट्रपति ने आ रपट सूंपी। विधि अर न्याय मंत्रालय रे मुजब आ समिति देशभर मांय चुनाव एके सागे करावण सारू दो दौर वाळी प्रक्रिया री सिफारिश कीनी है। मंत्रालय रे मुजब पहला दौर मांय लोकसभा अर राज्यां री विधानसभावां रा चुणाव एके सागे करावण अर दूजा दौर मांय नगरपालिकावां अर पंचायतां रा चुणाव करावण री सिफारिश करी ज्यी है। समिति नगरपालिका अर पंचायतां रा चुनाव लोकसभा अर राज्यां री विधानसभावां रा चुनाव पाछे एक सौ दिन री मियाद मांय करावण री सिफारिश कीनी है। समिति तीन ई लेवल माथे कराया जावण वाळा चुणाव सारू एक ही वोटरलिस्ट अर फोटो पहचान पत्र काम लेवण री सिफारिश ई कीनी है।

000

प्रधानमंत्री नरेन्द्र मोदी पहली दफा वोट देवण सारू तैयार नौजवानां रा उमाव रो दरसाव करण वाळो एक वीडियो साझा कीनो है। प्रधानमंत्री सोशल मीडिया र माथे पोस्ट मांय कह्यो के पूरा देश रा नौजवान मतदाता कह रह्या है-मेरा पहला वोट देश के लिए।

000

मुख्यमंत्री भजनलाल शर्मा पेपर लीक मामलां री जांच सारू बणायी ज्यी एसआईटी रा अहलकारां सागे आज मीटिंग कीनी। जयपुर मांय मुख्यमंत्री रा रेहवास माथे व्ही ई मीटिंग मांय पेपर लीक मामला मांय आरोपितां रे खिलाफ हाल तांई री कार्यवाही अर जांच रा बारा मांय विगतवार जाणकारी दीनी। करीब दो घंटा तांई चाली मीटिंग मांय पुलिस महानिदेशक यू. आर. साहू, एसओजी अर एटीएस रा अतिरिक्त महानिदेशक वी. के सिंह समेत पुलिस रा आला अहलकार सिरकत कीनी। मीटिंग पाछे खबरनवीसा सागे बातचीत करता थकां वी.के. सिंह कह्यो के पेपरलीक मामला मांय शामिल सगळा आरोपितां रे खिलाफ कानूनी कार्यवाही करी जावेला। वे कह्यो के एसआई पेपर लीक मामला मांय हाल तांई री कार्यवाही ऊं जनता मांय चोखो संदेश ग्यो है। वी.के सिंह कह्यो के हाल तांई री कार्यवाही ऊं जनता री ओर ऊं ई एसओजी ने जाणकारियां मिल रही है, ज्यां माथे आवता बगत मांय कार्यवाही करी जावेला।

000

मुख्यमंत्री भजनलाल शर्मा आज जयपुर मांय वां रा रेहवास माथे जनसुणवाई कीनी। वे जनता री समस्यावां सुण र अहलकारां ने वां रा निपटारा रा हुकम दीना। मुख्यमंत्री अहलकारां ने जनता री समस्यावां निपटावण माथे खास ध्यान देवण अर वां रो बेगो निपटारो तैय करण सारू कहयो। न्यारा-न्यारा जिलां मांय ई जिला कलेक्टर जन सुणवाई कीनी। सवाईमाधोपुर, बूंदी अर दोसा जिलां मांय ब्लॉक स्तर माथे जनता री समस्यावां सुणी ज्यी अर मामलां रो निपटारो करी ज्यो।

000

केंद्रीय गृह मंत्री अमित शाह ओजू कहयो है के नागरिकता संशोधन कानून-सीएए देश री नागरिकता रो हक देवण रो कानून है। वे साफ़ कीनो ओ कानून किण ई री नागरिकता नी छीनेला। एक समाचार एजेंसी सागे बातचीत मांय शाह कहयो के सीएए अफगानिस्तान, बांग्लादेश अर पाकिस्तान ऊं आ र देश मांय शरण ले र रह रहया हिंदू, सिख, बौद्ध, जैन, इसाई अर पारसी लोगां ने हक अर देश री नागरिकता देवेला। वे कहयो के नागरिकता संशोधन कानून रा प्रावधानां रा तैत आं सगळा लोगां ने बराबर हक मिलेला, कां कि नागरिकता मिल्यां पाछे वे ई भारत रा नागरिक बण जावेला। गृह मंत्री कहयो के देश रा अल्पसंख्यक नागरिकां ने घबरावण री जरूरत नीं है, कां कि सीएए मांय किण ई री नागरिकता कोसबा रो प्रावधान नी है।

000

सूचना अर प्रसारण मंत्रालय अश्लील सामग्री प्रसारित करण वाळा 18 ओटीटी प्लेटफॉर्म, 19 वेबसाइटों, 10 ऐप अर 57 सोशल मीडिया अकाउंट्स माथे रोक लगा दीनी है। आं मांय ड्रीम्स फिल्म्स, हंटर्स, हॉट शॉट्स वीआईपी, प्राइम प्ले अर अनकट अड्डा शामिल है। ओ फैंसलो मीडिया अर मनोरंजन, महिलावां अर बच्चा रा हक ऊं जुड़या डोमेन रा जाणकारां अर दूजा मंत्रालयां री राय ऊं सूचना प्रौद्योगिकी कानून 2000 रा प्रावधानां रा तैत करी ज्यो है।

000

राज्य मांय 31 खास सडकां अर स्टेट हाईवे ने और चौड़ी बणावण अर वां रा विकास सारू 9 सौ 72 करोड 80 लाख रूप्या मंजूर करी ज्यो है। केन्द्रीय सडक परिवहन अर राज मार्ग मंत्री नितिन गडकरी एक सोशल मीडिया पोस्ट मांय आ जाणकारी दीनी। वे बतायो के सात रेल्वे ऑवरब्रिज, अण्डर ब्रिज अर फलाई ऑवर बणावण सारू ई केन्द्रीय सडक अर आधारभूत संरचना निधि- ब्थ सेतुबंधन योजना ऊं ई 3 सौ 84 करोड 56 लाख रूप्या मंजूर करी ज्यो है।

000

उपमुख्यमंत्री दिया कुमारी बाड़मेर जिला रा सरहदी हलकां मांय सामरिक निजर ऊं खास 9 सडकां बणावण री मंजूरी दीनी है। करीब चार करोड रूप्या रा खर्च ऊं बणबा वाळी आं सडकां ऊं सरहदी हलकां रा गांवां अर बीएसएफ री खास चौकियां ताई बेहतर पहुंच बण सकेला।

000

भारतीय खाद्य निगम प्रदेश मांय गेहूं री सरकारी मोल माथे खरीदी सरू कर दीनी है। झालावाड़ जिला री चौमेला मंडी मांय गेहूं री खरीदी सागे ओ काम सरू व्हयो। खरीदी करी ज्यो गेहूं री रकम रो चुकारो किसानां रा खातां मांय 6 घंटां ऊं कम बगत मांय कर दियो ज्यो। ई बीचे कोटा संभाग मांय काल सरकारी मोल माथे चणा अर सरसों री खरीदी सरू करी जावेला। ई सारू ई-मित्र रे मार्फत नाम मण्डाया जा सके है। राजफेड रा महाप्रबंधक निरंजन सिंह राठौड़ आकाशवाणी ने बतायो के गेहूं री खरीदी 10 मार्च ऊं चाल रही है। खरीदी सारू सारू एक हजार 40 खरीद केंद्र बणायी ज्यो है। एक अप्रैल ऊं पूरा राज्य मांय सरकारी मोल माथे चणा अर सरसों री खरीदी सरू करी जावेला। ई सारू काश्तकार बाईस मार्च ऊं ई-मित्र रे जरिये नाम मण्डा सके है।

000

झुंझुनूं जिला रा शहीद महेन्द्र सिंह राजकीय उच्च माध्यमिक विद्यालय सोनासर मांय आज जिला कलेक्टर चिन्मयी गोपाल मुफ्त लाइब्रेरी कम काउंसलिंग सेंटर रो उद्घाटन कीनी। इण ऊं माली तौर ऊं कमजोर विद्यार्थियां ने मुफ्त भणार्ई-लिखाई, कोचिंग अर डिजिटल लाइब्रेरी रो सुबीतो मिल सकेला। सीबीईओ अनुसुइया सिंह कह्यो के इण ऊं विद्यार्थियां ने भणार्ई-लिखाई मांय सुबीतो मिल सकेला।

000

आवता लोकसभा चुनाव सारू वोटर लिस्टां मांय नाम हेरबा री प्रक्रिया रा तहत 17 मार्च ने राज्य रा सगळा मतदान केन्द्रां माथे खास अभियान चलायो जावेला। मुख्य निर्वाचन अधिकारी प्रवीण गुप्ता आ जणकारी दीनी। वे कह्यो के 17 मार्च ने प्रदेश रा सगळा 51 हजार 756 मतदान केन्द्रां माथे वोटर लिस्टां मांय नाम, क्रमांक अर मतदान केन्द्र री जाणकारी हासिल करी जा सकेला।

000

उप मुख्यमंत्री दिया कुमारी कह्यो है के जयपुर रो रवींद्र मंच म्हाणी कला अर संस्कृति रो अटूट हिस्सा है, जिण ने और नुवो बनायो जावेला। वे रवीन्द्र मंच माथे चाल रह्या रंग उत्सव मांय बोल रही ही। वे कह्यो के रवींद्र मंच रा बुनियादी ढांचा मांय और सुधार री जरूरत है। वे कह्यो के इण ऊं अठे कला अर संस्कृति ऊं जुड़्या आयोजन बेहतर तरीका ऊं व्हे सकेला अर स्थानीय कलाकारां ने वां री कलां रो दरसाव करण रो बेहतर मंच मिल सकेला। ई मौके दिया कुमारी रंग उत्सव मांय लगायी ज्यी स्टॉल्स अर न्यारा-न्यारा उत्पादा ने ई देख्या।

000

विज्ञान अर प्रौद्योगिकी मंत्री डॉ. जितेन्द्र सिंह घरेलू अर विश्व स्तर माथे हासिल करी ज्यी वैज्ञानिक उपलब्धियां मांय भारत रा काम री सराहवणा कीनी है। वे नई दिल्ली मांय आत्मनिर्भर भारत के लिए विज्ञान-प्रौद्योगिकी पैनोरमा के एक दशक नाम री रपट जारी करण रे मौके बोल रह्या है। मंत्री जितेन्द्र सिंह मिशन चन्द्रयान अर आदित्य एल-1 सरीखी उपलब्धियां रो जिकर करता थकां अंतरिक्ष विज्ञान रा हलका मांय भारत रा बूता री बात कही।

डॉ. सिंह भारत रा गगनयान मिशन माथे नाज करता थकां कह्यो के ओ मिशन अंतरिक्ष रा हलका मांय खोजबीन रा काम मांय देश रो मान और बधायो है। वे स्टार्टअप्स अर यूनिकॉर्न रे आगे बधबा री ई सराहवणा कीनी।

000

जयपुर रा शासन सचिवालय रा बगीचा मांय आज-काल न्यारा-न्यारा रंगां रा फूल खिल रह्या है। पी डब्ल्यू डी रा वरिष्ठ उद्यान अधीक्षक सुरेश नारायण शर्मा बतायो के ई मांय 40 ऊं बत्ती फुलवारियां अर गुलाब रा 10 भांत रा फूल अठे आवण वाळां ने घणा पसंद आ रह्या है।

000